

八

編

類

纂

八編類纂卷之一百五十五

左編

臣類

相臣

唐李泌

中興

李泌字長源，魏人。桂國嗣六世孫徙居京兆。七歲知爲文。玄宗開元十六年，悉召能言佛道孔子者相答難。禁中有員倣者，九歲升坐，詞辯注射，坐人皆屈。帝異之，因問童子豈有類若者。倣跪奏：「臣舅子李泌。」帝即馳召之。泌旣至，帝方與燕國公張訕觀奕，因使說試其能。說請賦「方圓動靜」。泌逡巡曰：「願聞其畧。」說因

自足解本
既明氣取

參善易類
共行年大
不增之虛

曰方若棋局。圓若棋子。動若棋生。靜若棋死。必因荅
曰。方若行義。圓若用智。動若騁才。靜若得意。說因賀
帝得奇童。帝大悅。曰。是子精神。要大於身。賜束帛。敕
其家曰。善視養之。張九齡。尤所獎愛。常引至卧内。九
齡與嚴挺之。蕭誠善。挺之惡誠。佞勸九齡謝絕之。九
齡忽獨念曰。嚴太苦勁。然蕭軟美。可喜。方命左右召
蕭。泌在旁。卒爾曰。公起布衣。以直道至宰相。而喜軟
美者乎。九齡驚改容謝之。因呼小友及長博。涉經史
精究易象。善屬文。以王佐自負。常遊嵩華。終南間。慕
神仙不死術。天寶中。詣闕獻復明堂九鼎議。帝憶其

早慧召講老子有頃得待詔翰林仍供奉東宮皇太子遇之厚常賦詩議誚楊國忠安祿山等國忠疾之詔斥置斬春乃潛遯名山以習隱自遼肅宗即位靈武物色求訪會泌亦自嵩穎間冒難奔赴行在至彭原謁見陳天下所以成敗事帝悅欲授以官固辭願以客從入議國事出陪輿輦至於四方文狀將相遷除皆與泌參議權踰宰相衆指曰着黃者聖人着白者山人帝聞因賜金紫拜元帥廣平王行軍司馬帝嘗曰卿事上皇中爲朕師友今下判廣平行軍朕父子資卿道義云帝從容問破賊期對曰賊掠金帛子

古今事不
相連處
看知之

女悉送范陽有苟得心詎能定中國邪華人爲之用
者獨周摯高尚等數人餘皆脇制偷合至天下大計
非所知也不出二年無寇矣陛下無欲速夫王者之
師當務萬全圖久安使無後害今詔李光弼守太原
出井陘郭子儀取馮翊入河東則史思明張忠志不
敢離范陽常山安守忠田乾真不敢離長安是以三
地繫其四將也隨祿山者獨阿史那承慶耳使子儀
毋取華令賊得通關中則北守范陽西救長安奔命
數千里其精卒勁騎不逾年而敝我常以逸待勞來
避其鋒去翦其疲以所徵之兵會扶風與太原朔方

軍互擊之。徐命建寧王爲范陽節度大使，北並塞與光弼相倚，以取范陽。賊失巢窟，當死。河南諸將手帝然之。會西方兵大集，帝欲速得長安，曰：「今戰必勝，攻必取，何假千里先事范陽乎？」泌曰：「必得兩京，則賊再強，我再困。且我所恃者，磧西突騎，西北諸戎耳。若先取京師，期必在春。關東旱熱，馬且病，士皆思歸，不可以戰。賊得休士養徒，必復來南。此危道也。」帝不聽。二京平，帝奉迎上皇，自請歸東宮，以遂子道。泌曰：「上皇不來矣。」人臣尚七十而傳，况欲勞上皇以天下事乎？帝曰：「奈何？」泌乃爲羣臣通奏，具言天子思戀晨昏。

藏身之固

字以無依
好做事

請促還以就孝養上皇得初奏荅曰當與我劔南一道自奉不復東矣帝甚憂及再奏至喜曰吾方得爲天子父遂下詔戒行中書令崔圓宦官李輔國以泌親信疾之泌畏禍願隱衡山有詔給二品祿賜隱士服爲治室廬泌嘗取松樛枝以隱背名曰養和後得如龍形者因以獻帝四方爭効之泌嘗語肅宗曰臣絕粒無家祿位第宅皆非所欲收復京師後得枕天子膝睡有司奏客星犯帝座一動天文足矣肅宗夜坐地爐燒二梨以賜泌潁王恃寵固求上不許曰汝飽食肉先生絕粒何爭耶時諸王請聯句潁王曰先

鄭武后亦
惡奇士也

生年幾許、顏色似童兒、信王曰、夜枕九仙骨、朝披一品衣、一王曰、不食于鍾粟、惟食兩顆梨、上曰、天生此間氣、助我化無爲、代宗立、召至含蓬萊殿書閣、初、泌無妻、不食肉、帝乃賜光福里第、強詔食肉、爲娶朔方故留後李暉甥、昏日、敕北軍供帳、元載惡、不附已、因江西觀察使魏少游請僚佐、載稱泌才、以試秘書少監、充判官、載誅帝、召還、復爲常袞所忌、出爲楚州刺史、辭不行、帝亦留之、會澧州闕守、袞盛言南方凋瘵、請輟泌治之、乃授澧朗峽團練使、徙杭州刺史、皆有風績、德宗在奉天、召赴行在、授左散騎常侍、時李懷

光叛歲又蝗旱議者欲赦懷光帝博問群臣泌破一
桐葉附使以進曰陛下與懷光君臣之分不可復合
如此葉矣由是不赦始朱泚亂帝約吐蕃赴援賂以
安西北庭旣而渾瑊與賊戰咸陽泚大敗吐蕃以師
追北不甚力因大掠武功而歸京師平來請如約帝
業許欲遂與之泌曰安西北庭控制西域五十七國
及十姓突厥皆悍兵處以分吐蕃勢使不得併兵東
侵今與其地則關中危矣且吐蕃向持兩端不戰又
掠我武功乃賊也奈何與之遂止貞元元年拜陝虢
觀察使泌始鑿山開車道至三門以便餽漕以勞進

檢校禮部尚書、泌奏虢州盧氏山野近出瑟瑟、請免
獻禁人開採、詔曰、瑟瑟之寶、中土所無、今產於近甸、
實爲靈貺、朕不飾器玩、不尚珍奇、常思返朴之風、用
明恭儉之節、其出瑟瑟之處、任百姓求採、不宜禁止、
淮西兵防秋屯鄆州、已而四千人亡歸、或曰吳少誠
密招之、旣入境、泌邀險悉擊殺之、三年、拜中書侍郎
同平章事、累封鄴縣侯、初張延賞減天下吏員、人情
愁怨、至流離死道路者、泌請復之、帝未從、因問今戶
口減承平時幾何、曰、三之二、帝曰、人旣凋耗、員何可
復、泌曰、不然、戶口雖耗、而事多承平十倍、陛下欲省

州縣則可，而吏員不可減。今州或叅軍署叅縣佐史判案，所謂省官者，去其冗員非常員也。帝曰：若何爲冗員？對曰：州叅軍無職事及兼試額外官者，是也。兼試自至德以來有之，比正員三之一。可悉罷。帝乃許。復吏員而罷冗官，必又條奏中朝官常侍賓客十員，其六員可罷，左右贊善三十員，其二十員可罷如舊制。諸王未出閣，官屬皆不除，而所收料奉乃多於減員矣。帝悅。是時州刺史月俸至千緡，方鎮所取無藝，而京官祿寡薄，自方鎮入八座，至謂罷權。薛邕由左丞貶歙州刺史，家人恨降之，晚崔祐甫任吏部員外

變句

求爲洪州別駕使府賓佐有所忤者薦爲郎官其當
遷臺閣者皆以不赴取罪去泌以爲外大重內大輕
乃請隨官閑劇普增其俸時以爲宜而竇參多沮亂
其事不能悉如所請泌又白罷拾遺補闕帝雖不從
然因是不除諫官唯用韓臯歸登泌因收其公廨錢
令二人寓食中書舍人署故時戲曰韓諫議雖分左
右歸拾遺莫辦存亡如是者凡三年始以韋綬梁肅
爲左右補闕旣復置人心欣然初興元後國用大屈
封物皆三損二舊制堂封歲三千六百縑後纔千二
百至是帝使還舊封於是李晟馬燧渾瑊各食實封

悉讓送泌。泌不納。時方鎮私獻於帝。歲凡五十萬緡。其後稍損至三十萬。帝以用度乏問泌。泌請天下供錢歲百萬給宮中。勸不受。私獻凡詔旨須索。即代兩稅。則方鎮可以行法。天下紓矣。俄加集賢殿大學士。修國史。泌建言。學士加大。始中宗時。及張說爲之。固辭。乃以學士知院事。至崔圓後。爲大學士。亦引泌爲讓而止。帝以前世上巳九日。皆大宴集。而寒食多與上巳同時。欲以三月名節。自我爲古。若何而可。泌請廢正月朔。以二月朔爲中和節。因賜大臣戚里尺謂之裁度。民間以青囊晨百穀瓜果種。相問遺。號爲獻。

信
經辭不足
信

生子、里間釀宜春酒以祭句芒神、祈豐年、百官進農書以示務本、帝悅、乃著令、與上巳九日爲三令節、中外皆賜緡錢燕會、四年八月、月蝕東壁、泌曰、東壁圖書、庥大臣當有憂者、吾以宰相兼學士、當之矣、昔燕國公張說由是以亡、又可免乎、明年果卒、年六十八、贈太子太傅、泌出入中禁、事四君、數爲權倖所疾、常以智免、好縱橫大言、時時讜議、能寤移人主、然常持黃老鬼神說、故爲人所譏切、

肅宗子建寧王倓、性英果、有才畧、從上自馬嵬北、行兵衆寡弱、屢逢寇盜、倓自選驍勇居上前、後血戰以

衛上上或過時未食。倭悲泣不自勝。軍中皆屬目向之上。欲以倭爲天下兵馬元帥。使統諸將東征。李泌曰。建寧誠元帥才。然廣平兄也。若建寧功成。豈可使廣平爲吳太伯乎。上曰。廣平冢嗣也。何必以元帥爲重。泌曰。廣平未正位東宮。今天下艱難。衆心所屬。在於元帥。若建寧大功旣成。陛下雖欲不以爲儲副。同立功者其肯已乎。太宗太上皇即其事也。上乃以廣平王俶爲天下兵馬元帥。諸將皆以屬焉。倭聞之。謝泌曰。此固倭之心也。泌又言於上曰。諸將畏憚天威。在陛下前敷陳軍事。或不能盡所懷。萬一小差爲害。

侯不著

甚大乞先令與臣及廣平熟議臣與廣平從容奏聞
可者行之不可者已之上許之上皇賜張良娣七寶
鞍李泌言於上曰今四海分崩當以儉約示人良娣
不宜乘此撤其珠玉付庫吏以俟庸戰功者賞之良
娣自閣中言曰隣里之舊何至如是上曰先生爲社
稷計也遽命撤之建寧王倓泣於廡下聲聞于上上
驚召問之對曰臣此憂禍亂未已今陛下從諫如流
不日當見陛下迎上皇還長安是以喜極而悲耳良
娣由是惡泌及倓

上嘗從容與泌語及李林甫欲敕諸將克長安發其

冢焚骨揚灰。泌曰。陛下方定天下。奈何讐死者。彼枯骨何知。徒示吾德之不弘耳。且方今從賊者皆陛下之讐也。若聞此舉。恐阻其自新之心。上不悅曰。此賊昔日百方危朕。當是時。朕不保朝夕。朕之全恃天幸耳。林甫亦惡卿。但未及害卿而歿耳。奈何矜之。對曰。臣豈不知所以言者。上皇有天下。向五十年。太平娛樂。一朝失意。遠處巴蜀。南方地惡。上皇春秋高。聞陛下此敕。必以爲用韋妃之故。內慙不懌。萬一感憤成疾。是陛下以天下之大。不能安其親。言未畢。上流涕被面。降階仰天拜曰。朕不及此。是天使先生言之也。

遂抱泌頸泣不已。

他日上又謂泌曰良娣祖母昭成太后之妹也上皇所念朕欲使正位中宮以慰上皇心何如對曰陛下在靈武以群臣望尺寸之功故踐大位非私已也至於家事宜待上皇之命。不過晚歲月之間耳上從之時張良娣與李輔國相表裏皆惡泌建寧王倓謂泌曰先生舉倓於上得展臣子之效無以報德請爲先生除害泌曰何也倓以良娣爲言泌曰此非人子所宜言願王姑置之勿以爲先倓不從至德二載上從容謂李泌曰廣平爲元帥踰年今欲命建寧專征又

倓幾事不

恐勢分。立廣平爲太子。何如。對曰。臣固嘗言之矣。我
事交切。須即區處。至於家事。當俟上皇不然。後代何
以辨陛下靈武即位之意邪。此必有人欲令臣與廣
平有隙耳。臣請以語廣平。廣平亦未必敢當。必出以
告廣平王。俶。俶曰。此先生深知其心。欲曲成其美也。
乃入固辭曰。陛下猶未奉晨昏。臣何心敢當儲副。願
俟上皇還宮。臣之幸也。上賞慰之。李輔國本飛龍小
兒。粗聞書紀。給事太子宫。上委信之。輔國外恭謹。寡
言。而內狡險。見張良娣有寵。陰附會之。與相表裏。建
寧王俟數於上前。詆訐二人罪惡。二人譖之於上。曰。

決不得請
答其後極
言以防將
來言雖切
不則矣

倏恨不得爲元帥謀害廣平王上怒賜倏歿於是廣
平王俶及李泌皆內懼倐謀去輔國及良娣泌曰不
可王不見建寧之禍乎倐曰竊爲先生憂之泌曰泌
與主上有約矣平京師則告還山庶免於患倐曰先
生去則倐益危矣泌曰王乃盡人子之孝良娣婦人
王委曲順之亦何能爲

德宗貞元中張延賞在西川與東川節度使李叔明
有隙上入駱谷值霖雨道途險滑衛士多亡歸朱泚
叔明之子昇等六人恐有奸人危乘輿相與齧臂爲
盟更鞚上馬以至梁州及還長安上皆以爲禁衛將

軍寵遇甚厚。張延賞知昇私出入郃國大長公主第。密以白上。上謂李泌曰。郃國已老。昇年少。何爲如是。殆必有故。卿宜察之。泌曰。此必有欲動搖東宮者。誰爲陛下言之。上曰。卿勿問。第爲朕察之。泌曰。必延賞也。上曰。何以知之。泌具爲上言。二人之隙。且曰。昇承恩顧。典禁兵。延賞無以中傷。而郃國乃太子蕭妃之母也。故欲以此陷之耳。上笑曰。是也。泌固請除昇他官。勿令宿衛。以遠嫌。以昇爲詹事。郃國肅宗之女也。適駙馬都尉蕭升。女爲太子妃。公主不謹。詹事李昇出入主第。或告主淫亂。且厭禱。上大怒。幽主於禁中。

切責太子太子請與蕭妃離昏上召李泌告之且曰
舒王近已長立孝友溫仁泌曰陛下惟有一子奈何
一旦疑之欲廢之而立姪得無失計乎上怒曰卿何
得間人父子誰語卿舒王爲姪者對曰陛下自言之
大曆初陛下語臣今日得數子臣請其故陛下言昭
靖諸子主上令吾子之今陛下所生之子猶疑之何
有於姪舒王雖孝自今陛下宜努力勿復望其孝矣
上曰卿違朕意何不愛家族耶對曰臣爲愛家族故
不敢不盡言若畏陛下盛怒而爲曲從陛下明日悔
之必尤臣云吾仕汝爲相不力諫使至此必復殺臣

臣子臣老矣、餘年不足惜、若寃殺臣子、以姪爲嗣、臣未得歆其祀也、因嗚咽流涕、上亦泣曰、事已如此、使朕如何而可、對曰、此大事、願陛下審圖之、臣始謂陛下聖德、當使海外蠻夷皆戴之如父母、豈謂自有子而疑之至此乎、臣今盡言、不敢避忌諱、自古父子相疑、未有不亡國覆家者、陛下記昔在彭原、建寧何故而誅、上曰、建寧叔實寃、肅宗性急、亦不足怪諸之者深耳、泌曰、臣昔者以建寧之故、辭官歸、誓不近天子左右、不幸今日復爲陛下相、又視茲事、臣在彭原、承恩無比、意不敢言建寧之寃、及臨辭、乃言之、肅宗亦悔而泣、先

帝自建寧之歿常懷危懼臣亦爲先帝誦黃臺瓜辭以防讒構之端上曰朕固知之意色稍解乃曰貞觀開元皆易太子何故不亡對曰臣方欲言之昔承乾屢嘗監國託附者衆東宮甲士甚多與宰相侯君集謀反事覺太宗使其舅長孫無忌與朝臣數十鞠之事狀顯白然後集百官而議之當時言者猶云願陛下不失爲慈父使太子得終天年左傳繼之并廢魏王泰陛下既知肅宗性急以建寧爲寃臣不勝慶幸願陛下戒覆車之失從容三日究其端緒而思之見陛下釋然知太子之無他也若果有其迹多此一誤當召大臣

知義理者二三人與臣鞠其左右必有實狀願陛下
如貞觀之法行之廢舒王而立皇孫則百代之後有
天下者猶陛下子孫也至於開元之時武惠妃譖太
子瑛兄弟殺之海內冤憤此乃百代所當戒又可法
乎且陛下昔嘗令太子見臣於蓬萊池觀其容表非
有蠶目豺聲商臣之相也正恐失於柔仁耳又太子
自貞元以來常居少陽苑在寢殿之側未嘗接外人
預外事安有異謀乎彼譖人者巧詐百端雖有手書
如晉愍懷褱甲如太子瑛猶未可信况但以妻母有
罪爲累乎幸賴陛下語臣臣敢以宗族保太子必不

知謀鄒使楊素許敬宗李林甫之徒承此旨已就錄
王圖定策之功矣上曰此朕家事何預於卿而力爭
如此對曰天子以四海爲家臣今獨任宰相之重四
海之內一物失所責歸於臣况坐視太子冤橫而不
言臣罪大矣上曰爲卿遷延至明日思之泌抽笏扣
頭泣曰如此臣知陛下父子慈孝如初矣然陛下還
宮當自審勿露此意於左右露之則彼皆欲樹功於
舒王太子危矣上曰具曉卿意泌歸謂子弟曰吾本
不樂富貴而命與願違今累汝曹矣太子遣人謝泌
曰若必不可救欲先自仰藥何如泌曰必無此慮願

太子起敬起孝，苟泌身不存，則事不可知耳。間日上
開延英殿，獨召泌，流涕闌干，撫其背曰：「非卿切言，朕
今日悔無及矣。皆如卿言。太子仁孝，實無他也。自今
軍國及朕家事，皆當謀於卿也。」泌拜賀。因曰：「陛下聖
明，察太子無罪，臣報國畢矣。臣前日驚悸亡魂，不可
復用。」願乞骸骨。上曰：「朕父子賴卿得全，方屬子孫傳
卿代代富貴，以報德何爲？」出此言乎？詔李昇等及公
主五子皆流嶺南及遠州。

代宗時元載以李泌有寵於上，忌之。與其黨攻之，不
已。會江西觀察使魏少游求參佐，上謂泌曰：「元載不

容卿朕今匿卿於少游所俟朕決意除載當有信報卿可束裝來乃以泌爲江西判官且屬少游善待之元載誅上召泌入見語以元載事曰與卿別八年乃能除此賊賴太子發其陰謀不然幾不見卿對曰臣昔日嘗言之陛下知羣臣有不善則去之含容太過故至於此上曰事亦應十全不可輕發

唐宗室李勉爲汴宋滑濮河陽等道都統討李希烈希烈攻勉勉嬰城守累月援莫至哀兵萬人潰圍出東睢陽累表乞自貶詔罷勉都統節度使檢校司徒平章事如故勉至長安素服待罪議者多以勉失

守大梁不應爲相李泌言於上曰李勉公忠雅正而用兵非所長及大梁不守將士棄妻子而從之者殆二萬人足以見其得衆心矣且劉洽出勉麾下勉至睢陽悉舉其衆以殺之卒平大梁亦勉之功也上乃命勉復其位

肅宗至鳳翔郭子儀自洛京引兵趨河東分兵取馮翊遂平河東上至鳳翔旬日隴右河西安西西域之兵皆會江淮庸調亦至長安入聞車駕至從賊中自拔而來者日夜不絕西師憊息既定李泌請遣安西西域之衆如前策並塞東北自媯檀南取范陽上曰

今大衆已集庸調亦至當乘兵鋒擣其腹心而更引兵東北數千里先取范陽不亦迂乎對曰今以此衆直取兩京必得之然賊必再強我必又困非久安之策上曰何也對曰今所恃者皆西北守塞諸胡之兵性耐寒畏暑若乘其新至之銳攻祿山已老之師其執必克兩京春氣已深賊收其餘衆遁歸巢穴關東熱官軍必困於思鄉不可留也賊休兵秣馬伺官軍之去必復南來然則征戰之勢未有涯也不若先用之於塞鄉除其巢穴則賊無所歸根本永絕矣上曰朕切於晨昏之戀不能待此決矣

德宗興元元年初肅宗在靈武上爲奉節王學文於
李泌代宗之世泌居蓬萊書院上爲太子亦與之遊
及上在興元泌爲杭州刺史上急詔徵之以爲左散
騎常侍日直西省以對朝野皆屬目附之時李懷光
叛上問泌河中密邇京城朔方兵素稱精銳如達奚
小俊等皆萬人敵朕晝夕憂之奈何對曰天下事甚
有可憂者若惟河中不足憂也夫料敵者料將不料
兵今懷光將也小俊之徒乃兵耳不足爲意懷光旣
解奉天之圍視朱泚垂亡之虜不能取乃與之連和
使李晟得取以爲功今陛下已還宮闕懷光不束身

爲隱若從一自有回互則蕭復不當受疑陛下何憚而不辯明乃且爲此悵悵也夫明則罔惑辯則罔冤惑莫甚於逆詐而不與明冤莫痛於見疑而不與辯是使情僞相糅忠邪靡分茲實居上御下之要樞惟陛下留意上亦竟不復辯也

時鳳翔節度使李楚琳殺張鎰得位雖數貢奉議者頗言其挾兩端有所狙伺然帝亦不能容其使至皆不得召欲以渾瑊代之贊諫曰楚琳之罪舊矣今議者乃始紛紜不亦晚哉且勤王之師在畿內者急亟宣告景刻不可差商嶺旣回遠而駱谷又爲賊所扼

通王命者。唯褒斜爾。若復阻。則諸鎮之向背者。我勝則來。賊勝遂往。此焉幾會。不容差跌。使楚琳逞憾。敢爲猖狂。南塞要衝。東與賊合。則我咽喉梗而心膂分矣。豈不病哉。今顧望兩端。是乃天誘其衷。通歸塗濟大業也。帝釋然盡召見其使。優詔勞安之。初上使諭吐蕃。遣兵同收京城。吐蕃聽命。五月。渾瑊奏吐蕃尚結贊屢遣人約。刻日共取長安。旣而不至。聞其衆今春大疫。近已引兵去。上以李晟渾瑊兵少。欲倚吐蕃以復京城。聞其去。甚憂之。以問陸贄。贄以爲吐蕃貪狡。有害無益。得其引去。實可欣賀。乃上奏。其畧曰。吐

蕃遷延觀望、翻覆多端、深入郊畿、陰受賊使、致令群
帥進退憂虞、欲捨之、獨前則慮其懷怨、乘驍欲待之、
合勢則苦其失信、稽延戎若未歸、寇終不滅、將帥意
陛下不見信任、且患蕃戎之奪其功、士卒恐陛下不
恤舊勞、而畏蕃戎之專其利、賊黨懼蕃戎之勝不久、
則悉遺之擒、百姓畏蕃戎之來有財、財必盡爲所掠、是
以順於王化者、其心不得不怠、陷於寇境者、其勢不
得不堅、今懷光別保蒲絳、吐蕃遠避封疆、形勢旣分、
腹皆無患、賊晨諸帥才力得伸、但願陛下慎於撫接、
勤於砥礪、中興大業、旬月可期、不宜尚眷眷於犬羊

之群以失將士之情也。上復使謂贇曰：卿言吐蕃形勢甚善，然賊戍諸軍當議規畫，令其進取。朕欲遣使宣慰，宜審細條疏以聞。贇以爲秦梁十里，兵勢無常，遙爲規畫，未必合宜。彼違命則失君威，從命則害軍事。進退羈礙，難以成功。不若假以便宜之權，待以殊常之賞，則將帥感悅，智勇得伸。且夫鋒鏑交於原野，而決策於九重之中，機會變於斯湏，而定計於千里之外，用捨相礙，否臧皆凶。上有掣肘之譏，下無死綏之志。傳聞與指實不同，懸筭與臨事有異。設使其中或有肆情于命者，陛下能如此時戮其違詔之罪乎？

是則違命者既不果行罰。從命者又未常合宜。徒費空言。祇勞眷慮。匪唯無益其損實多。且君上之權持異臣下。惟不自用。乃能用人。六月上問陸贄。今望鳳翔有迎駕諸軍形勢甚盛。欲因此遣人代李楚琳。何如。贄上奏以爲。如此則事同脅執。以言乎除亂。則不武。以言乎務理。則不誠。用是時巡。後將安入。議者或謂之權。宜臣竊未諭其理。不如俟奠枕京邑。徵授一官。彼喜於恩宥。將奔走不暇。安敢輒有旅拒復勞誅鉏哉。是時李晟已復長安。車駕將發。漢中帝欲以內外從官普號定難元從功臣。贄曰。宮官具寮恪居奔

走勞則有之、何功之云。難則嘗之、何定之云。今與奮命者齒、恐沮士之心、結勲臣之憤。帝乃止。京師已平。帝欲召渾瑊訪奔亡內人、給裝使赴行。在贊諫不可。且內人當離潰之後、或爲將士所私。昔人掩絕纓、飲盜馬者、豈忘其愛邪？知爲君之體然也。天下固多美人、何必獨此？帝不復下詔。猶遣使諭瑊資遣。初、劉從一、姜公輔等材下、不逮贊遠甚。徒以單言暫謀、偶有合、由下位建台宰而贊孤立。一意爲左右權倖沮短。又言事無所回諱。陰失帝意。久之不得宰相。還京。但爲中書舍人。毋韋猶在東京。遣中人迎還京師。俄

以喪解官、客東都、諸方賄遺一不取、惟韋臯以布衣
交、先以聞、故所致輒稱詔受之、又詔中人護父柩至
自吳會、葬洛陽、服除、以權知兵部侍郎、復召爲學士、
入謝、伏地、顰泣、帝爲興改容、慰撫眷遇、彌渥、天下屬
以爲相、而竇參素不平、忌之、贊亦數言參罪失、貞元
七年、罷學士、以兵部侍郎知貢舉、明年參黜、乃以中
書侍郎同平章事、帝始任楊炎、盧杞引樹私黨、排忌
忠良、天下怨疾、貞元後、懲艾其失、雖置宰相、至除用
廢官、反覆參詰、乃得下、及贊秉政、始請臺閣長官得
自薦、其屬有不職坐舉者、帝初許之、或言諸司所引

皆親黨招賂遺無實才帝復詔宰相自擇贊奏言所謂臺省長官僕射尚書丞郎御史大夫中丞是也陛下擇輔相多出其中行實不能頓殊也今乃謂不能進一二屬吏豈後位宰相則可擇天下材乎夫求才者貴廣考課者貴精往武后收人心務拔擢非徒人得薦士亦許自舉其才豈不易哉然而課責嚴進退速故當世稱知人之明累朝賴多士之用陛下當鑒獨任難于公舉有登廷之路無練覈之方武后以易得人陛下以精失士今擇宰相以重於庶品選長官以愈於下流及宰相獻言長吏薦士則有納橫議廢

始謀是任以重者輕其言待以輕者重其事也帝雖嘉之然卒停薦士詔舊制吏部選以歲集乾元後天下兵興率三年一調吏員稽壅則案牒叢淆偽冒蒙貞吏緣以爲姦廢置無綱至十年不被調者缺員或累歲不補贊乃請以內外員三分之每歲計闕集人檢柅吏姦天下便之當是時賈耽盧邁趙憬同輔政凡有司關白三人者更相顧不肯判贊又請如故事旬一人秉筆所咨輒判又以西北邊歲調河南江淮兵謂之防秋士不素練戰數敗將統制不一亡以應敵乃上陳弊謂宜罷四方之防秋者以其數析而三

之其一責本道節度募壯士願屯邊者徙焉其一則第以本道衣粟責關內河東募用蕃夏子弟願傳軍者給焉其一以所輸資糧給應募者以安其業詔度支市牛召工就諸屯繕完器具至者家給牛一耕耨水火之器畢具一歲給二口糧賜種子勸之播蒔須一年則使自給有餘粟者縣官倍價以售既息調發之煩又無幸免之弊出則人自爲戰處則家自爲耕與夫暫屯遽罷豈同日論哉然後建文武大臣一人爲隴右元帥自涇隴鳳翔薄長武城盡山南西道凡節度府之兵皆屬焉又詔一人爲朔方元帥由鄜坊

邠寧捷靈夏凡節度府之兵屬焉。又詔一人爲河東元帥舉河東極振武節度府之兵屬焉。各以臨邊要州爲治所。所部州若府選揀良吏爲刺史。外奉軍興內謀農桑。慎守中國所長。謹行當今所易。帝愛里其言不從也。初寶參惡左司郎中李巽出爲常州刺史。及參貶郴州巽爲湖廣觀察使。汴州節度使劉士寧遺參絹五十匹。巽奏交結藩鎮。上大怒。欲殺參。陸贄以爲參罪不至死。上乃止。旣而復遣中使謂贄曰。參交結中外。其意難測。社稷事重。卿速進文書。處分贄。上言。參朝廷大臣。誅之不可無名。昔劉晏之死。罪不

明白至使衆議爲之憤邑。叛臣得以爲辭。參貪縱之罪。天下共知。至於潛懷異圖。事跡曖昧。若不推鞠。遽加重辟。駭動不細。竇參於臣素分陛下所知。豈欲營救其人。蓋惜典刑有濫。三月更貶參驪州司馬。男女皆配流。上又命理其親黨。贊奏罪有首從。法有重輕。參既蒙宥。親黨亦應末減。况參得罪之初。私黨並已連坐。人心久定。請不問從之。上又欲籍其家。贊贊曰。在法反逆者。盡沒其財。賊汚者。止徵所犯。皆須結正。施刑。然後收籍。今罪法未詳。陛下已存惠貸。若簿錄其家。恐以財傷義。時宦官左右恨參尤深。謗毀不已。

參未至驩州、竟賜歿於路、竇申杖殺、貨財奴娼、悉傳
送京師、

八編類纂卷之一百五十六

左編

臣類

相臣

宋李綱

中興

李綱字伯紀無錫人也登進士第積官至監察御史以言事忤權貴改比部員外郎宣和元年京師大水綱上疏曰陰氣太盛當以盜賊外患爲憂朝廷惡其言謫監南劍州沙縣稅務七年冬金人敗盟分兵兩道入寇其一以王子幹離不爲帥寇燕山郭藥師敗燕山諸郡皆陷遂犯北其一以國相粘罕爲帥寇河

鄭亦言
之也痛哉
宋君蓋哉
謂臣非然
滿腹

東李師本叛忻代失守遂圍太原邊報猝至朝廷震
懼不復議守矣惟日謀避狄之計然其事尚秘外廷
未聞也至十二月中旬聞賊馬逼近始遣李鄴借給
事中奉使講和降詔罪已召天下勤王之師且命太
子爲開封府牧宰執日聚都堂茫然無策盡遣家屬
散之四方易置東南守臣具舟楫運寶貨爲東下計
於是避狄之謀外廷始聞綱時爲太常少卿素與給
事中吳敏厚善夜過其家謂敏曰事急矣建牧之議
豈非欲委以留守之任乎東宮恭儉之德聞於天下
以守宗社是也而建以爲牧非也巨盜猖獗如此宗

社不守中原且無人種自非傳以位號使招徠天下
豪傑與之共守何以克濟公官以獻納論思爲職是
不非時請對爲上極言之使言不合意不過一死
不輒於鴻毛者此其時也敏曰監國可乎綱曰不可
唐肅宗靈武之事當時不建號不足以復邦而建號
之議不出於明皇後世惜之上聰明仁慈倘感公言
一不能行此金人且將悔過退師宗社底寧豈徒
都城之人獲安天下之人皆將受賜非發勇猛廣大
慈悲之心忘身殉國者孰能任此敏翌日求對具道
所以且曰陛下果能用臣言則宗社靈長聖壽無疆

上曰何以言之。敍曰神霄萬壽宮所謂長生大帝君者。陛下也。必有青華帝君以助之。其兆已見於此。上感悟歎息。二十三日。上御玉華閣。召宰執吳敏等。對至日晡時。內禪之議已決。擢吳敏爲門下侍郎。草傳位詔。召百官班垂拱殿。下宣示詔旨。是夕命太子入居禁中。覆以御袍。太子俯伏感涕力辭。因得寢。夜半少蘇。又固辭不從。乃卽大位。御垂拱殿。見宰執百官。時日有五色暈。挾珥赤黃色。有重日相摩蕩久之。乃隱尊道君皇帝曰道君太上皇帝。道君皇后曰道君太上皇后。道君太上皇帝居龍德宮。道君太上皇后

為后來
缺本

宋世東宮
不失學問

居。擯。景。園。以。李。邦。彥。為。龍。德。宮。使。蔡。攸。吳。敏。副。之。皆。奉。道。君。皇。帝。旨。也。大。赦。天。下。上。以。東。宮。傳。位。之。意。致。四。方。疑。士。論。非。之。語。遣。節。度。使。梁。方。平。將。騎。七。千。守。濬。州。步。軍。都。指。揮。使。何。灌。將。兵。二。萬。扼。河。津。探。報。虜。騎。漸。逼。故。也。二。十。八。日。有。旨。召。對。延。和。殿。上。迎。謂。曰。卿。頃。論。水。章。疏。朕。在。東。宮。見。之。至。今。猶。能。誦。憶。嘗。為。賦。詩。有。秋。來。一。鳳。向。南。飛。之。句。綱。敘。謝。訖。因。奏。曰。陛。下。養。德。東。宮。十。有。餘。年。恭。儉。日。聞。海。內。屬。望。道。君。皇。帝。觀。天。意。隨。人。心。為。宗。社。計。傳。位。陛。下。受。禪。之。際。察。然。明。白。下。視。有。唐。為。不。足。道。也。願。致。天。下。之。養。極。所。

以崇奉者。以昭聖孝。今金寇先聲雖若可畏。然聞有
內禪之事。勢必消縮。請和厚有所邀求。於朝廷臣竊
料之大槩有五。欲稱尊號一也。欲得歸朝人二也。欲
增歲幣三也。欲求犒師之物四也。欲割疆土五也。欲
稱尊號如契丹故事。當法以大事小之義。不足惜。欲
得歸朝人。當盡以與之。以示大信。不足惜。欲增歲幣
當告以舊約。以燕山雲中歸中國。故歲幣增兩倍。今
既背約自取之。則歲幣當減。國家敦示和好。不校貨
財。姑如元數可也。犒師之物。當量力以與之。至於疆
土。則祖宗之傳子孫。當以死守。不可以尺寸與入。上

非徒無益
之徒

皆嘉納翌日除兵部侍郎靖康元年正月三日以吳
敏為行營副使以綱為叅謀官團練軍馬於殿前司
又以蔡攸為恭謝行宮使宇文粹中副之以治道君
皇帝東幸之具蓋幹離不之兵距河濬州不守梁方
平戰、刎、燒、橋、而、遯、何、灌、軍、馬、望、風、潰、散、賊、遂、渡、河、是
日、聞、報、故、也、夜、漏、二、鼓、道、君、出、通、津、門、東、下、道、君、皇
后、及、皇、子、帝、姬、等、相、續、以、行、侍、從、百、官、往、往、潛、遁、四
日、綱、侍、對、於、延、和、殿、下、聞、宰、執、奏、事、議、欲、奉、鑾、輿、出
豹、襄、鄧、間、竊、思、以、為、不、可、適、遇、知、東、上、閣、門、事、朱、孝
莊、於、殿、廷、間、語、之、曰、有、急、切、事、欲、與、宰、執、廷、辯、公、能

奏取旨乎。孝莊曰：「宰執未退而從官求對，前此無例。」綱曰：「此何時而用例邪？」孝莊許諾，卽具奏得旨，引對。綱拜訖，升殿立於執政之末。因啓奏曰：「聞諸道路，宰執欲奉陛下出狩以避狄，果有之，宗社危矣。且道君皇帝以宗社之故傳位陛下，今捨之而去，可乎？」上默然。太宰白時中曰：「都城豈可以守？」綱曰：「天下城池豈復有如都城者？且宗廟社稷百官萬民所在，捨此欲將何之？若能激勵將士，慰安民心，與之固守，豈有不可守之理？」語未旣，有內侍領京城使陳良弼自內殿出，奏曰：「京城樓櫓創修百未及一二，又城東樊家岡。」

聖斷

一帶壕河淺狹，決難保守。願陛下詳議之。上顧綱曰：卿可同蔡懋良弼往觀。朕於此俟卿。綱既被旨，同懋良弼亟詣新城東壁，遍觀城壕，回奏延和殿。車駕猶未興也。綱曰：城堅且高，樓櫓誠未備，然不必樓櫓亦可守。壕河惟樊家岡一帶，以禁地不許開鑿，誠爲淺狹。然以精兵强弩占據，亦可無虞。上顧宰執皆默然。綱進曰：今日之計，莫若整飭軍馬，揚聲出戰，固結民心，相與堅守，以待勤王之師。上曰：誰可將者？綱曰：朝廷平日以高爵厚祿，蓄養大臣，蓋將用之於有事之日。今白時中、李邦彥等，雖書生，未必知兵，然籍以位

號撫馭將士以抗敵鋒乃其職也時中怒甚厲聲曰李綱莫能將兵出戰綱曰陛下不以臣爲庸懦倘使治兵願以死戰第人微官卑恐不足以鎮服士卒上顧宰執曰執政有何闕趙野對曰尚書右丞關時宇文粹中隨道君東幸故也上曰李綱除右丞而賜袍帶并笏綱致謝宰執猶以去計勸上有旨命綱留守以李稅副之綱爲上力陳唐明皇聞潼關失守卽時幸蜀宗社朝廷碎於賊手累年然後僅能復之范祖禹謂其失在不能堅守以待勤王之師今陛下卽卽大位四方之兵不日雲集虜騎必不能久留捨此而

去如龍脫於淵。車駕朝發。而都城夕亂。雖臣等留守。何補於事。願陛下審思之。上意頗回。而內侍王孝塢從旁奏曰。中宮國公已行。陛下豈可留。上色變降御榻泣曰。卿等毋留朕。朕將親往。陝西起兵以復都城。決不可留此。綱泣拜俯伏上前。以死邀之。會燕越三王至。亦以固守爲然。上意稍定。卽取紙御書可回二字用寶。俾中使追還。中宮國公因顧綱曰。卿留朕治兵禦寇。專以委卿。綱再拜受命。與李枕同出治事。是夕宿于尚書省。而宰執宿于內東門司。中宮國公之行已遠。是夕未還。中夜上遣中使令宰執供軍令狀。

詰旦決行五日。綱自尚書省趨朝。道路復傳有南狩之事。太廟神主已出寓太常寺矣。至祥曦殿。則禁衛皆已擐甲。乘輿服御皆已陳列。六宮襍被皆將升車矣。綱因冒聲謂禁衛曰。爾等願以死守宗社乎。願扈從以巡幸乎。禁衛皆呼曰。願以死守宗社。不居此將安之。綱因拉殿帥王從濤等入見。曰。六軍之情已變。彼有父母妻子。皆在都城。豈肯捨去。萬有一中道散歸。陛下孰與爲衛。且虜騎已逼。彼知乘輿之去未遠。以健馬疾追。何以禦之上。感悟始命輟行。綱謂宰執曰。上意已定。敢有異議者。斬。因出祥曦殿。傳旨宣示。

禁衛皆拜伏呼萬歲復入勸上御樓以見將士復降步輦勞問將士綱與吳敏撰數十語叙金人犯順欲危宗社決策固守各令勉勵之意俾閣門官宣讀每讀一句將士聲諾須臾六軍皆感泣流涕於是固守之議始決是日以綱爲親征行營使馬軍太尉曹瑁副之白時中罷相以李邦彥爲太宰張邦昌爲少宰吳敏知樞密院事趙野爲門下侍郎王孝迪爲中書侍郎蔡懋爲左丞耿南仲同知樞密院事孝迪邦彥之姻家故薦之南仲出城已累日上遣使追還之以東宮官故有命親征行營使置司於大晟府辟參謀

官書寫機宜勾當公事管勾文字。準備差遣。統制統
領將領。準備差使等。擇文武官處之。吏房戶房兵房
工房。選三省人吏處之。上賜銀絹錢各一百萬貫匹
兩。文臣自朝請大夫以下。武臣自武功大夫以下。及
將校官。告宣帖三千餘道。一切許以便宜從事。自車
駕御樓之後。方治都城四壁守具。以百步法。分兵備
禦。每壁用正兵萬二千餘人。而保甲居民廂軍之屬
不與焉。修櫓樓。掛毬幕。安砲坐。設弩牀。運磚石。施燎
炬。垂楊木。備火油。凡防守之具。無不畢備。四壁各有
從宮宗室武臣爲提舉官。往督將士捍禦。網慮城上

兵卒不足用。卽告上乞禁衛班直善射者千人以從。上遣御藥盧端同行傳旨如所乞。自禁中至新城酸棗門幾二十里行夾道委巷中。惟恐賊之已登城也。抵門賊方渡濠以雲梯攻城。綱命班直乘城射之。皆應弦而倒。綱時坐酸棗門下有自門上擲人頭下者。至六七不已。詢之云。斬獲姦細俾驗認卽皆漢人首級也。蓋擾攘中兵卒妄行殺戮捕獲數人卽斬以徇。因使號令如獲姦細捕人親執出頭驗實推賞輒殺者。斬自是乃止。綱與官屬數人登舟督戰。近者以手砲欄木擊之。遠者以神臂弓強弩射之。又遠者以林

子弩座砲及之。而金賊有乘機渡濠而溺者。有登梯而墜者。有中矢石而踣者。甚衆。又募壯士數百人。縋城而下。燒雲梯數十座。斬獲酋首十數級。皆耳有金環。是日賊攻陳橋封丘衛州等門。而酸棗門尤急。虞箭集于城下。如蝟毛。士卒傷中者。皆厚賞之。上遣中使勞問。降御筆褒諭。給內庫酒銀碗綵絹等。以頒將士。人皆歡呼。自卯至未。申間殺賊數千人。賊知守城有備。乃退師。因遣使隨使人李鄴請和。抵城下。已昏黑矣。堅欲入城。綱傳令敢輒開門者斬。竟候明乃入。實初十日也。上御崇政殿。引使入對。出。幹離不書進。

既又不能
講亦不對

呈道所以舉師犯中國之意。聞上內禪。願復講和。乞遣大臣赴軍前議。上顧宰執未有對者。綱因請行。上不許。曰。卿方治兵。不可命李昉奉使。宰執退。綱問所以不遣之旨。上曰。卿性剛。不可以往。綱退。曰。今虜氣方銳。吾大兵未集。固不可以不和。然所以和者。得策則中國之勢遂安。不然禍患不已。宗社安危在此一舉。臣懼李昉柔懦。恐誤國事也。因爲上反覆具道。不可割地。及過許金幣。以爲金狄貪婪。又有燕人狡獪。爲之謀。必且過有邀求。如朝廷措置合宜。彼當戢歛而退。如朝廷震懼。一切與之。彼益肆覲覲計先定。然

後能應安危之機。上以爲然。綱退。巡歷城中。因乞宰
執分提舉四壁。上命蔡懋分提舉京城四壁守禦使。
而李稅是日至。金人軍中果辱命。幹離不者南向坐。
稅北面再拜膝行而前。幹離不遣燕人王汭等傳道
言語。議和須金五百萬兩。銀五十萬兩。絹絲各一百
萬匹。馬馳驢騾之屬各以萬計。尊其國主爲伯父。凡
燕雲之人在漢者悉歸之。割太原中山河間三鎮之
地。又以親王宰相爲質。乃退師。出事目一紙付稅等。
達朝廷。稅唯唯不能措。一辭金人笑之。十一日稅至。
進呈金人所須事目。且道其語。宰執震恐欲如其數。

悉許之。綱引前議力爭。金帛當量與之。太原河間中山。國家屏蔽。號爲三鎮。其實十餘郡地。塘灤險阻。皆在焉。割之何以立國。又保塞翼順。僖三祖陵寢所在。子孫奈何與人。至於遣質。卽宰相當往。親王不當往。爲今日計。莫若擇使與之。往返熟議。道所以可不可者。金幣之數。令有司會計。所有陸續具報。宿留數日。大兵四集。彼以孤軍入重地。勢不能久留。雖所得不滿意。必求速歸。然後與之盟。以重兵衛出之。彼且不收輕中國。其和可久也。宰執皆不以爲然。上爲群議所惑。無一人助綱言者。綱因再拜求去。上慰諭復前。

進曰。金人所須。宰執欲一切許之。不過欲脫一時之禍。不知他日付之何人。能爲陛下下了此願。更審處。後悔恐無所及。因出至城北壁。復回而誓書已行矣。所求悉皆與之。高宗方在康邸。俾同少宰張邦昌爲質於金人軍中。已無可奈何。則爲之留三鎮詔書戒中。書吏以輒發者斬。庶幾俟四方勤王之師集以爲後圖。而宰執裒聚金銀。自乘輿服御宗廟供具。六宮官府器皿皆竭取之。復率之於臣庶之家。金僅及三十萬兩。銀僅及八百萬兩。翌日對於福寧殿。於是孝廼建議欲盡括在京官吏軍民以牧簇犒設大金軍兵。

所遺多揭長勝於通衢立限俾悉輸之官限滿不輸者斬之許奴婢親屬及諸色人告以其半賞之限既滿得金二十餘萬兩銀四百餘萬兩而民間藏蓄爲之一空綱因對於福寧殿奏上曰民力已竭復許告許恐生內變外有大敵而民心內變不可不慮上曰卿可往收勝毋得告許綱因巡城過勝所令傳聖旨收勝歸行營司移牒孝迪照會人情乃安自十五日四方勤王之師漸有至者日數萬人乃於四壁置統制官招集之給芻糧授器甲踏塞地團隊伍皆行營司主之至十七八間統制官馬忠以京西募兵至還

金人於鄭州南門外乘勢擊之。於是金人始懼遊騎不敢旁出京城以南。民始獲奠居矣。二十日靜難軍節度使种師道承宣使姚平仲以涇原秦鳳路兵至。綱奏上曰：勤王之師集者漸衆，兵家忌分。節度歸一，乃克有濟。願令師道平仲等聽臣節制。上降御筆曰：師道老而知兵，職位已高，與卿同官替曹暉可也。蓋上意欲以師道爲親征行營副使，而宰執間有密建白以爲不可者。上入其言，於是別置宣撫司，以師道簽書樞密院事，充河北河東京畿宣撫司，以平仲爲宣撫司都統制，應西兵及四方勤王之師，並隸宣撫。

司又撰前後軍之在城外者屬之而行營司所統者獨左右中軍而已上屢申勅兩司不得侵紊節制既分不相統一宣撫使所欲行者託以機密往往不復關報行營司自金人議和誓書既行之後朝廷日運金銀幣帛之屬輸其軍中名果珍膳御醢之餉上又出御府珠玉玩好寶帶鞍勒以遺之綱每爭以謂此不足以爲德適所以啓戎心金人益肆須索至求妓樂珍禽馴象之類靡不從之及勤王之師旣集西兵將帥日至上意方壯又聞金人擄掠城北而城外后妃王子帝姬墳墓殯殮發掘殆盡始赫然有用兵之

意綱贊上曰易於謙之上六稱利用行師征邑國師之上六稱開國承家小人勿用蓋謙之極非利用行師不足以濟功師之成非戒用小人不足以保治今陛下之於金人屈已講好其謙極矣而金人貪婪無厭克恃愈甚其勢非用師不可然功成之後願陛下以用小人爲戒而已使金人有所懲創不敢有窺中國之心當數十年無夷狄之禍不然一日縱敵數世之患憂未艾也二十七日綱奏上曰金人之兵其實數不過六萬人又大半皆奚契丹渤海雜種其精兵不過三萬人吾勤王之師集城下者二十餘萬固已

數倍之矣。彼以孤軍入重地，正猶虎豹自投於陷穽中。當以計取之。莫若扼河津，絕糧道，禁抄掠，分兵以復畿北諸邑。俟彼遊騎出，則擊之，以重兵臨賊營。堅壁勿戰，如周亞夫。所以困七國者，俟其芻糧乏，人馬疲，然後以將帥檄取誓書，復三鎮，縱其歸牛渡。而後擊之，此必勝之計也。上以爲然，期卽分遣兵。以二月六日舉事。蓋姚古，種師中之兵，亦將至故也。約已定，而姚平仲者，古之子，屢立戰功，上以其驍勇，屢召對內殿，賜予甚厚。許以成功，當有節鉞茅土之賞。平仲先期於二月一日夜，親率步騎萬人，以劫金人之寨。

欲生擒幹離不者取康王以歸雖種師道宿戎中勿知也綱時以病給假臥行營司夜半上遣中使降親筆曰平仲已舉事決成大功卿可將行營司兵出封丘門爲之應援綱具劄子辭以疾且非素約兵不預備斯須之間中使三至責以軍令不得已力疾會左右中軍將士詰旦出封丘門勒兵於班荆館天駟監分命諸將解潛范瓊王師古等圍虜驍出沒鏖戰於幕天坡斬獲甚衆虜復犯中軍親率將士以神臂弓射卻之是夜宿於城外而平仲者前一夕劫寨爲虜所覺殺傷相當所折者不過千餘人旣不得所欲恐

以違節制爲師道所誅卽遁去而宰執臺諫聞之謂
西兵勤王之師及親征行營司兵爲金人所虜復
存者上震恐有詔不得進兵而幹離不遣使來詰責
用兵違誓之故宋人論以用兵特將帥所爲不出上
意請再和宰相李邦彥於上前語使人曰用兵乃太
臣李綱與姚平仲結構僉議欲縛綱以與之而使入
反以爲不可遂罷綱尚書右丞親征行營使以蔡懋
代之因廢行營使司止以守禦使總兵事而稱師道
亦罷宜撫使綱是時得止兵詔知事且變卽振旅以
入城詣崇政殿求對旣至殿門閤罷命乃不果退處

浴室院待罪時初三日也蔡懋會計行營司所失纔百餘人而西兵及勤王之師折傷千餘人外餘並如故乃知朝廷前所聞之非是夕上降親筆慰勞賜賚白金緡錢五百貫兩且令吳玠宣諭將復用之意綱感泣謝恩方欲丐歸田廬而有初五日士民伏闕之事初太學生陳東與書生千餘人是日詣闕上書明綱及師道之無罪不當罷軍民聞之不期而集者數十萬人填塞馳道街巷呼聲震地梃登聞鼓於東華門擊破之上遣吳玠耿南仲慰諭諸生俾之退及爲軍民所擁不得行必欲見綱及師道乃去不得報則

殺傷內侍二十餘人。又詬詈宰執李邦彥、蔡懋、王孝
趙野等，欲毆擊之，皆散走。藏匿。於是上遣中使召
綱及師道入對。綱聞命固辭，不敢行。而使使者絡繹
而至。綱師道乃不得已上馬出浴室院，由東門街抵
馳道，趨東華門。宣召中使朱拱之復爲衆所殺。蓋怒
其傳旨之緩也。入見上於福寧殿閣子中。綱泣拜請
死。上亦泣有旨，復尚書右丞充京城四壁守禦使。綱
固辭，上不允。俾出東華門至右掖門一帶安撫軍民。
綱稟上旨宣諭，乃稍散去。再對於福寧殿，上命綱復
節制勤王之師，先放遣民兵，蓋不復有用兵意也。先

是所留三鎮詔書網既罷乃遣宇文虛中齎詣金人軍中復差秦檜爲割地使是夕宿於咸豐門以金人進兵門外治攻具故也先是蔡懋號令將士金人近城不得輒施放有引砲及發牀子弩者皆杖之將士憤怒網既登城令施放自便能中賊者厚賞夜發霹靂砲以擊賊軍皆驚呼翌日薄城射却之乃退有告梁方平欲爲賊內應者網召至帳中執之以付御史臺推治凡內侍之守城者皆罷京師浮浪不逞之徒乘軍民殺傷內侍擾攘中劫勅內侍十餘家取其金帛而以所藏器甲弓劔付官司納自以爲功凡其餘

人綱命悉集守禦使司以次納訖推其倡首將黨之
各自言其姓名凡二十餘人審問得實悉皆斬之明
日并斬殺傷部隊將者亦二十餘人初賊馬旣抵城
下綱晝夜巡視有盜袖襖一領者有強取婦人絹一
匹者有妄以平民爲姦細而斫傷者卽斬以徇金人
請以越王代康王爲質上以越王叔父不可遣乃遣
肅王及駙馬都尉曹成以行康王得歸康王素有膽
勇膂力善射居金人軍中幾月姚平仲劫寨之名恬
然無有驚怖及歸國人皆喜爭出覲之金人自平仲
劫寨及封丘門接戰之後頗有懼意旣得三鎮之詔

及肅王爲質卽不俟金幣數足遣使告辭上賜宴於
軍中初十日遂退師十二日賜赦天下十三日宰執
對延和殿綱奏上曰澶淵之役雖與遼盟約而退猶
遣重兵護送之金人退師今三日矣初謂其以船楫
渡河探聞乃繫橋濟師一日而畢盡遣大兵用澶淵
故事護之宰執皆以爲太早綱固請之上可其請是
日分遣將士以兵十餘萬數道並進便利可擊卽擊
之十四日以吳敏爲少宰綱知樞密院事徐處仁中
書侍郎耿南仲左丞李昉右丞初李邦彥蔡懋王孝
迪趙野旣爲國人所斥逐皆藏匿不敢復出上章乞

罷至是俱罷十七日澤州奏金粘罕兵次高平縣初
粘罕既破忻代觀察使折可求以麟府兵承宣使劉
光世以鄜延兵援河東皆爲所敗遂圍太原攻之月
餘不能下而平陽府義軍叛義軍者童貫張孝純所
招雲中人也及金人入寇孝純以義軍五萬人守石
嶺關既叛以從金人矣至是諸郡往往殺戮或逐出
之而平陽府者破城叛去攻陷威勝軍遂引金人入
南北關陷隆德府遂次高平朝廷震懼恐其復渡河
而南宰執各綱盡遣城下兵以追幹離不之師綱曰
幹離不之師既退自當遣大兵護送初不虞粘罕之

來也。粘罕之師雖來，聞旣和，亦當自退。必無復渡河之理。又太行懸車之險，已遣統制官郝懷將兵二萬屯河陽，控扼險道，決無他慮。而宰執中有密啓上者，於是御前以金字牌悉追還諸將之兵。諸將之兵追及幹離不之師於邢趙間，相去二十餘里。金人聞大兵且至，莫測多寡，懼甚。其行甚速，而諸將得追詔，卽還。綱聞之上，前力爭得旨復遣，而諸將之還已五程矣。雖復再進，猶與金人相及於滹沱河。然將士知朝廷之議論二三，悉解體。於是金人復旁出抄掠，及深祁恩冀間。其去殊緩，而粘罕之兵聞已和果退，如綱

旨勞問復傳教旨允綱遂登舟入幄中於簾前拜訖具道皇上聖孝思慕道君皇后親加獎諭綱再拜謝訖道君皇后曰朝廷欲令於何處居止綱對曰朝廷見以櫛景園爲寧德宮奉道君皇后蓋遵稟道君皇帝十二月二十三日聖旨指揮道君皇后曰已得旨令居禁中綱對口以皇帝聖孝殿下聖慈母子之情豈復有間但稽之三從之義道君皇帝居龍德宮而殿下居禁中於典禮有所未安朝廷討論但欲合於典禮以慰天下之望兩宮安則天下安矣綱拜辭登岸因呼內侍楊修李侁等三人坐幄次與再道前語

三人皆巨璫以綱言爲然因入白之復傳教旨曰相公所論甚有理但旣居寧德宮後欲一到禁中神御前燒香可乎綱對曰道君皇后旣居寧德宮皇帝自當時詣省問萬一欲暫到禁中豈有不可之理因遣使賜香茶酒食等錢五百貫給散隨行使臣從人綱以前語具劄子奏知而道君皇后入國門日聶山請以禁衛護宣德門道路喧然識者笑之二十日抵南都二十一日引對道君御幄殿綱具道上聖孝思慕欲以天下養之意道君泣數行下曰皇帝仁孝天下所知且獎諭曰都城守禦天下再安相公之力爲多綱

再拜謝訖。因出劄子二紙進呈。其一乞道君早回鑾
輿。不須詣亳社。西都以慰天下之望。其一自敘素蒙
道君教育。擢用於國家艱危之中。得效犬馬之力。欲
乞身歸田廬之意。道君慰勞再四。因曰。相公頃爲史
官。緣何事去。綱對曰。臣昨任左史。得侍清光者幾一
年。以狂妄論列都城水災。伏蒙聖恩寬斧鉞之誅。迄
今感戴。道君曰。當時宰執中有不喜公者。綱愧謝。因
奏曰。臣昨論水災。實偶有所見。自古雖無道之國。水
猶不冒其城郭。天地之變。各以類應。正爲今日兵革
攻圍之兆。因詢虜騎攻圍都城守禦次第。綱具以實

對復曰賊既退師方渡河時何不邀擊。綱曰朝廷以肅邸在金人軍中故不許。道君曰爲宗社計豈可復論此。綱於是竊歎道君天度之不可及也。語既浹洽。道君因宣諭行宮止遞角等三事。只緣都城已受圍。恐人知行宮所在。非有他也。綱對曰方艱危時。兩宮隔絕。彼此不相知。雖朝廷應副行宮事。亦不容無不至者。在聖度照之而已。道君因詢問朝廷何故追贈司馬光。綱對曰方金寇在外。人情恐懼不安。司馬光實得都人之心。故追贈之。欲慰都人心。又問曰何故拆夾城。公知所以置夾城之意否。綱對以不知道君

曰內禪之意久已定。但人不知。偶緣金人犯闕。事成於倉卒間爾。本欲內禪。後於夾城中往還。抱子弄孫。不欲令皇帝頻出。人主頻出。則不威。此本意也。綱對曰。臣久在外方。實不知此意。如朝廷近日拆去夾城之意。則臣知之。夾城中通宮苑。皆游燕之地。自艮嶽九曲池。至龍德宮後。正與金水門相接。金人下寨在金水門外。平時夾城中有清衛兵卒。巡防灑掃。自金寇犯闕。盡應募守城。夾城中無一卒守宿。故拆去。使與宮禁相絕。備不虞也。如此之類。凡詢十數事。皆逐一解釋。因從容復奏曰。皇帝仁孝小心。惟恐一有不

當道君意者每得御批詰問輒憂懼不進膳臣竊譬
之人家尊長出而以家事付之子第偶遇強盜劫掠
須當隨宜措置及尊長將歸子弟不得不恐然爲尊
長者正當以其能保田園大計慰勞之不當問其細
故道君感悟曰公言極是朕只緣性快問後即便無
事因內出玉帶金魚袋古象簡賜綱曰行宮人得公
來皆喜以此慰其意便可佩服綱固辭不允因服之
以謝而退二十二日扈從道君詣鴻慶宮燒香初綱
至拱州見奉迎道君禁衛寶輦儀物等留不進因以
便宜作奉聖旨令趨南都至是道君燒香禁衛寶輦

儀物等適至南都士女民庶夾道聳觀道君又出尚書省劄子云朝廷有指揮行宮內侍十人皆與在外宮觀不得入京城此輩皆是目在左右梳頭繫累不可缺之人綱奏曰如聖意欲留容臣攜此劄子歸奏知皇帝取旨道君曰甚好數內兩人係童貫親戚不須留餘人如馮彥等只乞留龍德宮祇應得旨來早辭訖先還闕二十三日道君宣諭曰本欲往亳州太清宮以道路阻水不果又欲居西洛以皇帝懇請之勤已更指揮更不戒行公先歸達此意慰安皇帝因袖中出書付綱仍宣諭曰公輔助皇帝捍賊守宗社

有大功若能調和父子間使無疑阻當書青史垂名萬世綱感泣再拜受命二十五日還抵闕下對於垂拱殿進呈道君御書以所賜玉帶牙簡銀絹等物進納有旨不允二十七日宰執奏事咸和殿進呈車駕出郊請資福殿奉迎道君儀注耿南仲建議欲盡屏道君左右內侍出榜行宮門敢留者斬先遣人搜索然後車駕進見綱以謂不若止依常法不必如此示之以疑必欲過爲之防恐却有不可防者耿南仲當以堯舜之道輔陛下而其人闇而多疑所言不足深採上笑之南仲怒甚旣退南仲忽起奏曰臣適遇左

司諫陳公輔於對班中。公輔乃二月五日爲李綱結
構士民伏闕者。豈可處諫職。乞送御史臺根治。上及
宰相皆愕然。綱奏曰。臣適與耿南仲辯論于延和殿。
實爲國家。非有私意。而南仲銜臣之言。故有此奏。伏
闕之事。陛下素所鑒察。臣不敢復有所辯。但臣以菲
材冒處樞輔。仰荷特達之知。未能有所補報。區區素
志。欲俟賊騎出疆。道君鑾輿還闕。然後求歸田廬。臣
之願也。今南仲之言如此。臣豈敢留。願以公輔事送
有司。臣得乞身待罪。上笑曰。伏闕士庶以億萬計。如
何結構南仲。猶論不已。綱再辭上而出。居啓聖院。竟

不復歸府入劄子求去章凡十餘上上皆批荅封還
不允道君以四月三日入國門綱以守禦使職事迎
拜於新東門內道君於輦上顧揖翌日扈從朝於龍
德宮訖復上章懇請求罷知樞密院事上降手詔數
百言不允復命徐處仁吳敏諭旨又召至內殿面加
慰諭且曰賊馬方退正賴卿協濟艱難今據欲捨朕
何之前事不足介懷宜爲朕少留辭意懇惻綱不得
已再拜受命就職他日奏曰金人退師交割三鎮三
鎮官吏軍民不肯陷沒夷狄其勢必爲朝廷堅守天
時浸熱而虜有輜重之累必不能久留當卽出疆臣

恐秋高馬肥虜必再至以責前約及今宜飭武備修邊防勿恃其不來當恃吾有以待之於是爲上條具所以備邊禦敵者凡八事其一謂唐之藩鎮所以拱衛京師故雖屢有變故卒賴其力而及其弊也有尾大不掉之患祖宗監之銷藩鎮之權罷世襲之制施於承平邊備無事則可在今日則手足不足以捍頭目爲今之計莫若以太原真定中山河間建爲藩鎮擇帥付之許之世襲收租賦以養將士習戰陣相爲唇齒以捍金人可無深入之患又滄州與營平相直隔黃河下流及小海其勢易以侵犯宜分濱棣德博

建橫海軍一道如諸鎮之制則帝都有藩籬之固矣其二謂自熙豐以來籍河北保甲凡五十餘萬河東保甲凡二十餘萬比年以來不復閱習又經燕山雲中之役調發科率逃亡流移散爲盜賊今所存者猶及其半宜專遣使團結訓練令人置器甲官爲收掌用印給之蠲免租稅以償其直武藝精者次第遷補或命之官以激勸之彼旣自保鄉里親戚墳墓必無逃逸又平時無養兵之費有事無調發之勞此最難之得者其三謂自祖宗以來養馬於監牧擇陝西河東河北美水草高涼之地處之凡三十六所比年廢

罷殆盡而更爲給地牧馬民間雜養以充數官吏便文以塞責而馬無復有善者又驅之燕山悉爲敵人所得今諸軍缺馬者大半宜復祖宗監牧之制權時之宜括天下馬量給其直則不旬月間數萬之馬可具也其四謂河北塘灤東拒海西抵廣信安肅深不可涉淺不可以行舟所以限隔胡騎爲固險之地而此年以來淤泥乾涸不復開濬官司利於稻田往往洩去積水隄防弛壞又自安肅廣信以抵西山地形低下處可益增廣其高仰處卽開乾壕及陷馬坑之類宜專遣使以督治之其五謂河北河東州縣城池

類多隕圯堙塞宜徧行修治而近京四輔郡畿邑皆當築城創置樓櫓之屬使官吏兵民有所恃而安萬一有賊騎深入擄掠無所得可以坐困其六謂河北河東州縣經賊馬殘破蹂踐去處宜優免租賦以賑卹之往年方臘擾浙東猶免三年今三鎮之民爲朝廷固守安可不議所以大慰其心者其七謂河北河東諸州最以儲峙糴買糧草爲急務宜復祖宗加擡糧草鈔法一切以見縉走商賈而實塞下使沿邊諸郡積蓄豐裕則虜不可動矣其八謂陝西解鹽無煮海之勞而給邊費足民食其利不貲因行東南鹽法

而解鹽地分益狹西邊益貧願復祖宗舊制以慰關
陝兵民之心上俾宰執同議而其間所論異同雖建
橫海軍一道以安撫使總之而藩鎮之議寢雖委提
舉官遵舊制教閱上戶保甲三分之一而遣使盡行
團結訓練置器甲之議不行雖委公邊增修塘泮城
池而輔郡畿邑已降指揮旋即罷止雖委諸路相視
監牧而不復括馬雖放河北河東租稅而止及一年
雖行加擡糴草鈔而貼以四方香藥雖復解鹽而地
分不如舊制綱力爭之不能得大抵自賊馬旣退道
君還宮之後朝廷恬然遂以爲無事方建議立東宮

開講筵斥王安石置春秋博士而臺諫所論不過指摘京輔之黨行遣殆無虛日防邊禦寇之策反置而不問。綱竊私憂之惟兵事樞密院可以專行乃與許翰條具調發防秋之兵大槩有五一曰係將兵二曰不係將兵三曰土兵四曰民兵五曰保甲係將兵除已起發外見在者十將將以三千人爲率不過三萬人民兵弓箭社刀弩手之類是也不過一萬人保甲除河北河東外起於陝西不過三萬人并見在河北河東兵通爲二十萬以控制要害之地將上得旨頒行然後關三省其間猶有以不須如此者